

Hof ta haya cu tin suficiente prueba

COLOMBIANO CARLOS HENRIQUEZ ROJAS LO WORDE EXTRADITA PA MERCA

ORANJESTAD(AAN) -- Ayera Hof a dicta sentencia den e caso di extradicion contra e Colombiano Carlos Henriquez Rojas, kende ta ser busca pa autoridadnan Americano relaciona cu traficacion di droga.

E caso aki a worde trata dia 29 di November, caminda autoridadnan Americano a manda mas documentonan pa usa como prueba contra Rojas pa asina e por worde extradita pa Merca.

Ademas di e declaracion di e Arubiano R.P., kende a ser deteni na New Jersey, DEA a manda mas declaracion cu ta muestra culpabilidad di Rojas.

A manda declaracion di e homber W.W. y tambe a manda un declaracion adicional mas extenso di R.P. caminda ta muestra cu ta Rojas tabata esun cu ta suministra e droga.

Ta asina cu autoridadnan Americano entre otro DEA ta sospecha Rojas di traficaion di droga y produccion di "crack".

Na New Jersey, despues di detencion di e Arubiano R.P., miembronan di DEA a haci un investigacion na un cas caminda a descubri un gran cantidad di boter conteniendo "crack" y tin sospecho cu ta Rojas ta e autor di esaki.

Abogado Flanders a condena e hecho cu diripiente autoridadnan Americano a bin cu un declaracion amplio di R.P. y uno di W.W. El a señala, dicon den promer instante no a haci esaki. Flanders a bisa Hof cu e tin masha duda tras e declaracion di W.W.

Flanders ta kere cu den e caso aki, agentenan di DEA a pidi W.W. su cooperacion pa declara contra Rojas y a cambia e ta haya cierto beneficiacion. Segun Flanders, e sistema aki ta worde masha hopi usa na Merca, caminda inhustamente ta encarcela

un hende a base di declaracion formula cu un solo meta esta pa encarcela e hende.

Flanders ta haya cu Corte mester ta hopi cuidadoso den casonan di extradicion.

Ayera Hof a dicta sentencia y notable tabata cu abogado Flanders a notifica Hof cu e no kier ta presente. Ta asina cu Rojas ta un di e presonan cu a huy for di KIA pero a ser atrapa.

Aparentemente abogado Flanders ta condena e hecho aki y lo no kier ta presente den Corte pa no crea e impresion cu e ta apoya su cliente.

Juez mr. van der Griendt, kende ta encabeza Hof a bisa cu abogado Flanders durante tratamiento di e caso a trece padilanti cu no tin suficiente prueba contra Rojas. Mr. van der Griendt a indica cu Hof no ta di acuerdo cu e ponencia aki.

Hof ta haya cu e evidencianan adicional cu a ser




manda, ta duna suficiente prueba contra Rojas. Ademas di esaki, Hof ta haya cu autoridadnan Americano a cumpli cu tur e requisitonan di e tratado y no tin motibo pa rechaza e peticion.

Hof su decision ta cu ta aproba e peticion y lo conseha Gobernador esaki tambe.

Por a nota cu Rojas no tabata mucho contento cu e decision. Bao vigilancia, el a ser hiba den un cuarto den edificio di Corte, cual tabata completamente cera. Na Corte tambe tabata presente un patruya di Polis pa tuma e precausionnan necesario cu Rojas lo no bolbe trata di core bay.

Awor cu Hof a aproba e peticion di Merca, tin cu spera ariba agentenan di DEA, kendenan lo bin cu un avion pa busca e Colombiano aki kende lo mester bay duna cuenta na Merca pa loke e ta ser acusa di dje.

CU NO TA KERE, MES TA ASINA?!!!



DIARIO